

Z fal 505 inv. 395 pièce 2

INSTRVCTION

SERVANT AV PROCEZ

pendant pardeuers le Roy & Nosseigneurs de son Conseil.

Entre Me Thomas Brillard demandeur, d'vne part.

Et M^{re} Henry de Guenegaud, sieur du Plessis, Secretaire d'Estat, cy-deuant Tresorier de l'Espargne, defendeur d'autre.



A contestation des parties a commencé par la signification faite à M. du Plessis le 5. Nouembre 1665. d'vn estat de liquidation contenant six articles, montant à vn million six cents quatorze mille deux cents cinquante-neuf liures huit sols, dont Brillard luy a demandé la restitution.

M. du Plessis est demeuré d'accord de quelques-vns de ces articles, & n'est pas conuenu des autres. Ainsi pour donner vne forme certaine à l'affaire, & la rendre plus intelligible, Brillard l'a reduite à trois Chefs.

Le premier, regarde les remboursemens faits en l'année

Le second, ceux de 1641.

Et le troisiesme, ceux de 1644. & 1647.

Le premier des trois Chefs aboutit à la restitution d'vne somme de six cents mille liures, pour raison du rapport de



deux septiemes du principal au denier quatorze, de soixante & quinze mille liures de rentes, remboursées au denier dixhuit en l'année 1638. & la difference du denier quatorze au denier dix-huit.

Par le second Chef, Brillard a demandé deux cents six mille six cents quatre-vingts liures dix sols huit deniers, à quoy monte le rapport des deux septiemes du principal au denier quatorze de vingt-cinq mille huit cents trente-cinq liures vn sols quatre deniers de rente remboursées au denier dix-huit en 1641, auec la dissernce du denier quatorze au denier dix-huit.

Et par le troisième, Brillard a conclu à la restitution de huit cents cinquante-vn mille deux cents quatorze liures, procedans des remboursemens faits és années 1644. & 1647. à raison de quatre-vingts mille liures de rente assignées sur les Tailles, auec les interests, à compter du jour qu'elle a esté receuë jusques à celuy de l'entiere restitution.

A Vant que d'entrer dans l'examen de ces trois Articles, il est necessaire de poser pour vn sondement en l'assaire, que les remboursemens qui ont donné lieu aux restitutions dont il s'agit, ont esté faits pendant les exercices de Messieurs de Guenegaud freres, M. du Plessis ayant fait les exercices des années 1638. & 1641. & M. de Guenegaud qui luy a succedé, ayant exercé pendant les années 1644. & 1647.

Cela presupposé, M. du Plessis demeure d'accord, à l'esgard du prenier Chef, qu'il a esté remboursé de vingt-sept mille six cents vingt-quatre liures quatre sols de rente; sçauoir de quinze mille six cents vingt-quatre liures quatre sols en commun auec ses coheritiers, dont il ne luy appartient qu'vn cinquiéme, montant à trois mille cent vingt-quatre liures quinze sols, & de douze mille liures de rente en son particulier; Et qu'au surplus le remboursement desdits vingt sept mille six cents vingt-quatre liures quatre sols, n'a esté fait que sur le pied du denier quatorze, ainsi qu'il se fait voir par le double de son compte rendu en la Chambre, & par les thentiques.

Donc du propre adueu de M. du Plessis, il y a preuue du rembourlement de vingt-lept mille six cents vingt-quatre liures quatre sols de rente; Et il est vray que pour les quarante-lept mille trois cents soixante & quinze liures restans de la partie de soixante & quinze mille liures, il est bien difficile d'en rapporter la preuue par elcrit, estant pardeuers M. du Plessis, qui peut bien s'excuser de rapporter les menus de comptant & Ordonnances qui ont esté brûlées par ordre du Conseil; mais qu'il est absolument inexcusable de ne pas rapporter les Arrests de Prests, & les minuttes des roolles en papier qui sont demeurez pardeuers les Tresoriers de l'Espargne, & les ont deu conseruer comme leurs minutes originales sur lesquelles sont escrits les fonds, pour yauoir recours, estant les titres de leur seureté, mesme en cas d'inscription en faux contre les grosses; mais nonobstant ce defaut, qui procede du fait du defendeur, il y a encore preuue suffisante au procez, que le rachapt entier des soixante-quinze mille liures a esté fait au profit de M. du Plessis, & le remboursement au denier dix-huit.

Cette preuue se tire du Prest de trois millions neuf cents mille liures, fait par M. du Plessis dans son année d'exercice, à s'en rembourser sur les recettes generales des Finances de Paris, Rouen, Caën, Tours, Poitiers, Limoges, Riom,

Thoulouse, Montpellier & Lyon.

Or il est de notorieté publique que c'estoit l'vsage du temps, qu'au lieu d'interests les presteurs se faisoient accorder vn tiers en remboursement de rentes; ce qui s'accordoit indistinctement à tous ceux qui prestoient, & les remboursemens s'en faisoient au denier dix-huit, auec cette precaution toutessois, que pour garder ordre de compte, ce remboursement paroissoit estre sait au denier quatorze, & le surplus se supleoit par Ordonnance de comptant.

Vsage si constant, que par la Declaration de 1664. renduë pour le fait des rentes racheptées, il est expressément porté; que ceux qui auront receu des remborsemens des années 1637. & 1638. seront tenus de les restituër au denier dix-huit, à faute de verisser du contraire.

Cette preuue seroit facile à M. du Plessis, tout comptable estant obligé d'auoir pardeuers soy les papiers de son exercice; mais il en faudroit vne plus sidelle que celle qui resulte des comptes de l'Espargne qu'il produit, & qui à dire vray ne passeront que pour vne pure illusion apres ce qui a esté allegué & prouué, & ne peuuent estre tirez à

aucune consequence.

Brillard adjouste qu'il a esté expedié vne Ordonnance de comptant de trois cents mille liures, dont il tire contre M. du Plessis vne fort grande preuue, car en ce cas il faudroit que les interests du prest n'eussent esté accordez qu'au denier treize, & encore bien au dessous; parce que c'estoit vn remboursement assigné sur les receptes generales, dont le recouurement est dissicile, ne se faisant ordinairement qu'en deux années, & sur ce pied l'interest n'auroit esté accordé qu'au denier trente, ce qu'on ne presumera pas aisément d'vn presteur, ny des Tresoriers de l'Espargne, qui ont tousiours stipulé & perceu les interests des prests qu'ils ont faits au denier dix & quelquessois à quinze pour cent.

Et ne faut pas que M. du Plessis mette en auant que cette clause cy-dessus mentionnée, portée dans les Declarations des rentes rachetées ne soit que de stile, & n'ait pas son essert car elle a eu son execution toute entiere dans les affaires de cette nature qui se sont presentees, & la commission des rentes racheptées, & les Arrests qui sont sur ce interuenus au Conseil du Roy, ont esté rendus en consor-

mité de cette disposition.

Cela se void par ce qui a esté ordonné pour raison des prests faits en 1637. & 1638. par Antoine Barré, Claude Gaspard, Iacques Mimbrel, Guillaume du Mesnil, François Mahu, Iean Tresorier, Iacob de la Fonds, Nicolas Viard, Iean Palloy, Vincent Merle, Florentin Bonnet, Iean Broüard, François Bertrand, Nicolas du Cauroy & autres, en tous lesquels prests il auoit esté passé vn tiers en remboursement de rentes au denier dix-huit au prosit des presteurs; & tout recemment les heritiers Daganry, Bertaut, Louuigny, Boutard, Dalibert & Fermiers des Gabelles,

belles, dont les autheurs auoient fait prest, sous le nom de Florentin Bonnet, d'vne somme de trois cents mille liures dans laquelle ils auoient esté remboursez, de seize mille six cents soixante & six liures treize sols quatre deniers de rente au denier dix-huit, la restitution en a esté ordonnée sur la mesme proportion, & l'Arrest executé.

Semblable condemnation est interuenuë contre les heritiers des successions de Galland & de Boyer, dont les autheurs auoient fait passer dans vn prest de la somme de dix-huit cents mille liures, trente-trois mille six cents trente trois liures six sols huit deniers de rente au denier dixhuit.

Les sieurs Bonneau, Gargan, Galland, & autres interessez, sirent prest le dernier Octobre 1637. sous le nom de
Guillaume du Mesnil de six millions trois cents quarante
mille liures, dans lequel ils se firent rembourser pour cent
seize mille six cents soixante & six liures treize sols quatre
deniers de rente au denier dix-huit. Ils ont encore esté condamnez comme les autres en la commission des rentes racheptées.

Le 10. Iuillet de la mesme année les seus sieurs de Bretonuilliers & Keruer sirent vn prest, sous le nom de Iacques d'Artois, dans lequel ils se sirent rembourser pour quinze mille six cents soixante & six liures treize sols quatre deniers de rente au denier dix-huit, & ont esté de

melme condamnez.

Le 17. Ianuier de la mesme année, Frarin, Dalibert, Aceré, & autres interessez, ont fait vn prest, sous le nom de Iean Tresorier, de la somme de neuf cents mille liures, dans lequel il a esté passé pour seize mille six cents soixante & six liures treize sols quatre deniers de rente, sur le pied du denier dix-huit, dont la restitution a esté ordonnée à la mesme raison.

Le 11. Nouembre 1638. les sieurs Bonneau, Boyer, Galland, Aragonnois, Frarin, le Camus, Montebise, le Vasseur, Gargan, Lamy, Chahu, de Beaumont, Chassepot, Yues & le Cocq des Forges, firent vn prest de sept millions deux cents deux mille huit cents liures, dans lequel

ils firent passer pour cent trente-trois mille six cents trentetrois liures six sols huit deniers de rente, dont la restitution a aussi esté ordonnée à raison du denier dix-huit.

Les heritiers du seu sieur de Guenegaud des Brosses & autres, sirent vn prest le 3. Septembre 1637. sous le nom de Claude Boucher, dans lequel ils sirent passer onze mille cent onze liures de rente sur le pied du denier dix-huit, & la restitution en a esté de mesme ordonnée.

La Dame Coulon & Iean Galland firent vn prest en 1637. sous le nom de Christophle Chocq, dans lequel ils fournirent pour deux cents soixante & six mille six cents soixante & six liures en principal de rentes au denier dixhuit, & la restitution a esté de mesme ordonnée.

Les Tresoriers de France à Moulins, Amyot Payeur des rentes, Clement & autres associez, firent vn prest le 20. May 1638. sous le nom de François Bertrand, dans lequel ils firent passer cinq mille cinq cents cinquante-cinq liures onze sols de rente sur le mesme pied, en consequence de-

quoy pareille condamnation est interuenuë.

On pourroit à ces exemples en adjouster beaucoup d'autres; mais il suffit que l'vsage du temps demeure constant, que les impressions que s'efforce de donner M. du Plessis par le moyen des comptes qu'il a rendus à la Chambre, dans lesquels ces remboursemens ne sont employez que sur le pied du denier quatorze, soient entierement essacées, & que le lieu demeure à la verité.

Mais apres tout, n'est-il pas mesme extraordinaire qu'au milieu de tant de precautions, que M. du Plessis qui estoit maistre de tous les papiers des Espargnes a pû prendre, & qu'il a prises en esset, pour destourner vne reproche qu'il preuoyoit; qu'apres tant de deguisemens & d'interpositions de noms, Brillard ait pû penetrer si auant, & rapporter tant de preuues pour la justification des faits qu'il a aduancez.

Car enfin il ne faut rien attendre icy de bonne foy ny de sincere: La meilleure, ou plustost l'vnique desense de M. du Plessis est dans vne negatiue perpetuelle, & son conseil est persuadé qu'il sussit de soustenir que c'est à Brillard à prouuer, & que l'on est toûjours bien receu à reconnoistre

la verité apres que la preuue paroist, quelque denegation

que l'on en ait faite.

Tesmoin ce qui s'est passé à l'esgard des rachapts receus par M. du Plessis sous le nom de Louis Pajart; la demande luy en fut faite en 1654. par Pierre de Launay: M. du Plessis s'en defendit, en soultenant positiuement que ce fait n'estoit point veritable, & qu'il n'en auoit aucune connoissance. De Launay se satisfit d'vne declaration si ingenuë : Brillard a esté plus défiant, sa recherche a esté plus heureuse, il a rapporté les preuues de ses faits. Cette preuue a excité la bonne foy de la partie; elle en a fait vn lincere adueu, & a passe condemnation, comme l'on le presumera, fort volontaire: Et sans doute si Brillard auoit deueloppé aussi heureusement tant d'autres remboursemens faits en 1638, qui sont employez dans les Registres de l'Espargne sous des noms inconnus, M. du Plessis ne manqueroit pas de venir au lecours, la memoire s'ouuriroit, & il reconnoiltroit pleinement la verité des faits dont la preuue seroit rapportée.

Sa Majesté cependant en jugera, c'est à elle à qui appartient de dissiper par ses lumieres tous les nuages dont on s'esforce de couurir cette assaire; Elle en sera le juste discernement, & sçaura bien distinguer la verité d'auec les dégui-

semens dont on a voulu embarasser ce procez.

Quant au second Chef, qui consiste en vn remboursement fait sous le nom d'Antoine de Leule en 1641. de vingt cinq mille huit cents trente-cinq liures vn sol quatre deniers de rente en seize parties, toute la contestation se reduit de sçauoir si ce remboursement a esté fait au denier quatorze ou au denier dix-huit, & comme les raisons employées à cét esgard sur les precedens articles sont communes pour celuy-cy, il seroit inutile de les repeter.

Quant au troissesse Chef, qui est le plus important de l'affaire, pour juger si la demande qui en est faite à M. de Guenegaud est legitime, il faut examiner trois propositions. La premiere, si dans la constitution & le rachapt de soixante-deux mille cent quatre-vingts seize liures de rente sur les Tailles, le Roy a sousser quelque prejudice, & s'il a commis en cela quelque maluersation dont l'on doiue rechercher les

auteurs.

La deuxiesme, Si M. de Guenegaud est coupable d'auoir employé l'Ordonnance entiere de disserence de sonds d'un million quarante mille liures, quoy qu'il n'ait sait recette que d'onze cents dix-neuf mille cinq cents trente-sept liures pour le capital des rentes.

La troissesme, Si c'est à son profit que les rentes ont esté

constituées, & que le rachapt en a esté fait.

Les pieces rapportées justifient que par vn Arrest du Conseil en forme de Traité, du 7. Octobre 1642. il est ordonné qu'il sera restably quatre-vingts mille liures de rente sur les Tailles; & qu'à cét esset il sera expedié des Lettres de Declaration, que l'on fera verisser en la Chambre des Comptes, le principal de ces rentes au denier dix-huit estoit d'vn million quatre cents quarante mille liures, le Traitant promit d'en payer quatre cents mille liures, qui estoit sur le pied du denier cinq, & du surplus montant vn million quarante mille liures, on luy en fait remise, & l'on promet d'en expedier vne Ordonnance de disserence de sonds.

En execution de ce Traité les Lettres patentes de restablissement de quatre-vingts mille liures de rente sur les huict millions des Tailles ayant esté expediées, la Chambre des Comptes en resusal la verification; mais y ayant eu des Lettres de Iussion elles surent registrées le 19. Aoust 1643, sur la requeste de Seuerin Besnard, qui estoit celuy sous le nom duquel auoit esté fait le Traité pour la constitution de ces

rentes.

Ce Traité pourtant n'a pas esté executé, au contraire par vn Arrest du Conseil du 29. Septembre en la mesme année, il sut ordonné que les quatre-vingts mille liures de rente seront vendus par le Preuost des Marchands aux particuliers qui en voudront acquerir, en payant le sort principal entre les mains du sieur du Plessis, Secretaire d'Estat, & auparauant Tresorier de l'Espargne, pour les employer aux despenses de l'année 1641.

En consequence le 16. du mesme mois M. du Plessis Guenegaud est commis à la recette des deniers de cette constitution par Lettres patentes, verissées en la Chambre des Comptes: & au mois de Ianuier suiuant il a expedié les quittances sur lesquelles les Contracts ont esté deliurez;

mais

9

mais au lieu que la constitution devoit estre de quatrevingts mille liures, & que M. du Plessis estoit obligé de faire recette d'vn million quatre cents quarante mille liures, l'on n'a constitué que soixante & deux mille cent quatrevingts seize liures dix sols, & le sieur de Guenegaud n'a fait recette que de onze cents dix-neuf mille cinq cents vingt-six liures. Mais il faut remarquer qu'outre l'Ordonnance de comptant d'vn million quarante mille liures, pour la difference de fonds du denier cinq au denier dix-huit, il en a esté expedié vne autre de lix cents mille liures pour trois quartiers des arrerages de ces rentes, pendant l'année 1644. dont on suppose que le traitant ou les acquereurs auoient droit de jouir. Ces deux Ordonnances ensemble composent la somme de onze cents mille liures. Il n'a point esté fait d'autre recette sur cette constitution, ny par le sieur de Guenegaud, ny par aucuns de les confreres que les onze cents dix-neuf mille cinq cents vingt-fix liures pour le sort principal des soixante & deux mille cent quatre-vingts six liures dix sols. Ainsi il doit demeurer constant que pour vne somme de dix-neuf mille cinq cents trente-sept liures, on a creé soixante & deux mille cent quatre-vingts six liures onze sols de rente.

Si ces rentes estoient encore en nature, il seroit facile d'en ordonner la suppression, & d'obliger ceux qui en auroient jouy d'en rapporter les arrerages; mais le rachapt en a esté quasi aussi prompt que la constitution, & dans le compte du sieur Claude de Guenegaud, Tresorier de l'Espargne en l'année 1644. il employe sept cents deux mille 1ept cents cinquante vne liures pour le rembourlement d'vne partie de ces rentes, & le surplus a esté rachetté, & le remboursement qui monte à cent soixante & huit mille liures, en est employé dans le compte de 1647. qui estoit encore l'année d'exercice du sieur de Guenegaud. De sorte que ceux au profit desquels le remboursement a esté fait, ont receu en deniers comptans huit cents soixante & dix mille sept cents cinquante-vne liures, sur lesquelles déduisant les dix nouf mille cinq cents trente-sept liures, qui est la seule chose qui ait esté actuellement payée du prix de la constitution, on ne peut pas reuoquer en doute que le Roy ne souffre

prejudice de plus de huit cents cinquante mille liures qui doiuent estre rapportez auec les interests, par le Traitant ou par ceux qui ont receu le remboursement de ces rentes.

Cette premiere propolition a d'autant moins beloin de preuue, que personne n'aduoüant auoir receu ce remboursement, M. du Plessis soustenant n'y auoir point d'interest, il n'a pas osé s'engager directement à prouuer qu'il n'y ait point eu de maluersations dans cette affaire; il s'est renfermé simplement dans la denegation, & a pretendu qu'on ne luy pouuoit rien imputer, parce qu'on ne justifioit point que la constitution de ces rentes, ny le rachapt, eussent elté faits à son profit. Mais parce qu'on luy objecte que la constitution des quatre-vingts mille liures de rente n'ayant point esté acheuée, il n'a pas deu employer dans l'estat de menu de comptant l'Ordonnance entiere d'vn million quarante mille liures, laquelle devoit estre diminuée & n'auoir son effet qu'à proportion que les rentes eltoient constituées, il soustient qu'il a fait recepte entiere des quatorze cents quarante mille liures, & que si cette recepte ne paroist pas libellée dans ion compte, c'est que le reste montant trois cents vingt mille quatre cents soixante-trois liures, a passé en remise, au moyen de laquelle le sieur du Plessis s'est chargé vers son frere du restant de la constitution. Qu'au surplus l'on ne descharge les Ordonnances de comptant que lors que les prests ou les traitez sont reuoquez; Qu'il n'y a jamais eu d'Edict qui ait retracté ou suspendu la creation des quatrevingts mille liures de rente, & que le total de cette constitution ayant esté donné en assignations à plusieurs particuliers pour des despenses employées en son compte, les contracts en deuoient estre expediez; de sorte qu'on ne pouuoit pas diminuër vne Ordonnance qui deuoit sublister & auoir lieu pour le tout.

Il seroit facile de faire voir beaucoup de contradiction dans les defenses de M. du Plessis; Il aduouë d'abord qu'il n'a receu pendant son exercice de l'année 1641. que la somme de onze cents dix-neuf mille cinq cents trente-sept liures de ceux ausquels & pour lesquels les constitutions ont esté faites, & cependant il dit que pour le surplus il y auoit des assignations données à diuers particuliers pour des dépenses em-

ployées dans son compte. Mais s'il y a eu des assignations données, comme le sieur du Plessis le suppose, sur le surplus de cette constitution, & qu'elles soient employées dans la dépense de son compte, il doit en mesme temps auoir expedié aux particuliers ou des quittances ou des billets libellez sur cette nature de deniers, & de ces quittances ou billets il deuroit s'en charger en recette dans son compte.

Aussi peut-on soustenir que le sieur du Plessis, Tresorier de l'Espargne, commis à receuoir le sort principal d'vne constitution de rente, ayant employé dans son compte l'Ordonnance entiere de disserence de fonds, il est obligé de faire recette du prix entier de la constitution; autrement il peut estre accusé d'obmission de recette, & condamné à la peine du

quadruple.

On demeure d'accord qu'il n'y a point de chapitre de reprise dans les Comptes de l'Espargne, & que la recette &
la despense doiuent tousiours estre égalles; mais il faut
aussi conuenir que les Tresoriers de l'Espargne ont toûjours fait la meilleure partie de leur recette & despense en
papier, & non pas en argent comptant : de sorte que lors que
des assignez, porteurs d'vne Ordonnance de sonds, venoient
à l'Espargne, le Tresorier de l'Espargne prenoit leur Ordonnance & leur quittance qu'il employoit en despense
dans son compte, & leur deliuroit des billets ou des quittances sur le fond mentionné en l'Ordonnance, & de ces billets ou quittances il s'en chargeoit en recette, sans se mettre
en peine si ceux ausquels il les auoit deliurez en auoient
receu le payement ou non.

Le mesme vsage se pratique encore à present, & la seule disserence qui s'y rencontre est qu'on ne donne point aujourd'huy d'assignations qu'elles ne soient bonnes & essectiues, & dont le fonds ne soit entre les mains des Receteurs ou des Fermiers. Ces maximes ne peuvent estre disputées par ceux qui ont vne legere teinture de ce qui se pratique à l'Espargne. Comment ceux qui ont travaillé aux Requestes du sieur de Guenegaud peuvent-ils dire que les despenses qui ont consommé les quatre cents mille liures qui estoit l'essectif des quatre-vingts mille liures de rente, sont employez dans son compte; mais qu'à cause que le

debit des rentes n'estoit pas encore fait, qu'il n'a pû se charger en recette que de ce qu'il auoit receu; Il presuppose qu'il y auoit des assignez pour quatre cents mille liures, qui ont fourny leur quittance de pareille somme. S'il est ainsi, le sieur de Guenegaud qui ne leur fournissoit pas de l'argent comptant, n'a-t'il pas dû leur donner des billets ou des quittances sur le fonds sur lequel ils estoient alsignez, c'est à dire sur les deniers qui prouiendroient de la constitution de quatre-vingts mille liures de rente, & ces billets qu'il estoit indispensablement obligé de leur expedier, joints à l'Ordonnance de comptant d'vn million quarante mille liures auroient composé la recepte entiere d'vn million quatre cents quarante mille liures, il arriue souuent que l'on leue des assignations, & que l'on expedie des billets de l'Espargne sur vne constitution de rente, non seulement au delà du sort principal; mais encore mesme que les rentes ne soient point constituées. Ainsi rien n'empeschoit M. du Plessis de donner à ces assignez, dont il dit que les Ordonnances & les acquits sont employez dans la despense de son compte des billets de l'Espargne, libellez sur les deniers procedans de la constitution des quatre-vingts mille liures de rente, & s'il ne l'a pas fait, c'est vne preuue certaine qu'il n'y auoit point d'assignez, & qu'il estoit seul interessé dans cette constitution.

Mais pour examiner plus particulierement l'vnique defense qu'il allegue; sçauoir, Qu'il s'est chargé en recepte du surplus de la constitution enuers le sieur Claude de Guenegaud, son frere; est-ce assez pour la justification d'vn Tresorier de l'Espargne, conuaincu d'auoir fait vn faux employ d'vne Ordonnance de difference de fonds, quoy que les rentes en la constitution desquelles elle deuoit seruir n'ayent esté constituées que pour partie, Est-ce assez d'articuler que le sieur Claude de Guenegaud, son frere, luy ait remis le surplus de cette constitution, & qu'il luy en a donné la quittance? Celuy qui allegue vn fait justificatif en doit auoir la preuue en main, la maluersation est constante par des pieces incontestables, qui sont l'Ordonnance de comptant, & le compte rendu par le sieur de Guenegaud. Et pour ce qui concerne cette pretenduë remise, non feulement

seulement il ne rapporte aucune preuue pour en establir la verité; mais il est aisé de faire voir Qu'il est contre le sens commun, Qu'il est impossible qu'on se soit seruy de remise en cette occasion.

Pour cela il faut presupposer qu'encore qu'vn Tresorier de l'Espargne ne puisse plus faire de nouuelle recette lors que son exercice est finy, & qu'il a compté par estat au Conseil, quand neantmoins il a expedié des billets sur vne nature de deniers il les peut en tout temps, mesme apres son compte examiné à la Chambre, conuertir en quittances. Si donc il est vray, comme M. du Plessis l'articule qu'il ait fait la recepte entiere des quatorze cents quarante mille liures qui estoit le capital de la constitution; Que les despenses qui en ont absorbé le fonds entier soient comme il le presuppose, employez dans son compte, il faut qu'il ait expedié des billets pour pareille somme auant la closture de son estat au Conseil. Et outre qu'on pourroit demander pourquoy les porteurs de ces billets ne les faisoient pas conuertir en quittances? Pourquoy on ne leur expedioit pas des Contracts comme l'on auoit fait au nommé la Roche & la Coste? En vn mot, pourquoy on n'acheuoit pas au profit des assignez la constitution entiere de quatre-vingts mille liures? l'on ne sçauroit alleguer aucun pretexte vray-1emblable de ce retardement. L'on auoit deliuré pour soixante-deux mille cent quatre-vingts seize liures dix sols de Contracts de constitution, pourquoy ne pas expedier le surplus à ceux qui en auoient payé le prix, & fourny des descharges à l'Espargne? Pourquoy se seruir d'vne voye extraordinaire de remise, & ne pas consommer cette constitution auant que l'Estat du sieur du Plessis fust arresté au Conseil: Mais presupposé qu'il y eust quelque raison de differer l'expedition des Contracts, ces assignez n'auoient qu'à garder leurs billets que le sieur de Guenegaud pouuoit en tout temps conuertir en quittance. Il leur estoit non seulement inutile, mais mesme prejudiciable, de se seruir d'vne remise, & les billets que le sieur Claude de Guenegaud leur auroit pû expedier en consequence, leur seroient demeurez entierement inutiles. M. du Plessis estoit commis à receuoir les deniers de cette constitution par Lettres patentes du Roy, registrées en la Chambre des Comptes. Il estoit le seul qui pust faire recette du sort principal de cette constitution : les Contracts ne pouvoient estre expediez que fur ses quittances: cependant l'on veut feindre qu'il ait fait actuellement la recette entiere de cette constitution, Que les despenses par lesquelles elle a esté consommée, soient employées dans son compte; Et parce, dit-on, qu'il estoit prest de fortir d'exercice, & qu'il ne pouuoit plus acheuer cette constitution, il s'est descharge du surplus en le remettant és mains d'vn de les contreres. Cette propolition est tellement contraire à l'ordre des Finances, qu'elle contient vne absurdité euidente, car si M. du Plessis auoit receu les quatorze cents quarante mille liures tous entiers, comme il s'efforce de le faire croire, il falloit qu'il eust expedié des billets pour pareille somme, & ces billets en tout temps, mesme encore à present, il pouvoit les convertir en quittances, & donner les descharges & les expeditions necessaires pour acheuer le surplus de la constitution.

Îl y a dauantage pour faire que le sieur de Guenegaud acheuast cette constitution; Ne falloit-il pas vn Resultat du Conseil, & vne Commission du grand Sceau, registrée en la Chambre des Comptes? On ne rapporte pas la moindre de toutes ces pieces. Il est constant que non seulement cette constitution n'a point esté acheuée par le sieur Claude de Guenegaud; mais que ny dans le compte de l'Espargne de l'année 1644, ny dans les autres suiuans, il n'a esté fait ny par luy ny par ses confreres aucune recette de cette nature

de deniers.

Ceux qui sont porteurs de billets de l'Espargne ont recours à des remises lors qu'ils apprehendent de n'estre pas
payez sur le sond assigné, & que le Tresorier de l'Espargne
qui les a expediez estant prest de compter, ils craignent que
leurs billets ne puissent estre resormez: Mais quand il y a des
billets assignez sur vne nature de deniers qui ne peuuent
estre diuertis, comme sur le capital d'vne constitution qui
n'est pas encore épuisée, ceux qui en sont porteurs les peuuent sur le champ faire conuertir en quittances; & en consequence se faire deliurer des contracts. Et quand ils auroient
quelque raison d'en saire surseoir l'expedition, cette conuer-

sion de billets en quittances peut estre faite en tout temps. Les Ordonnances de remises sont non seulement inutiles à cét esgard, mais elles seroient vn obstacle presque inuincible à leur dessein.

Si M. du Plessis auoit allegué que le debit de ces rentes n'estant pas aussi prompt qu'on l'auoit esperé, & que ceux qui gouvernoient les Finances estans resolus d'en acheuer la constitution, & de les vendre ou de les donner en payement, l'obligerent dans cette veuë de remettre à son frere ce qui n'auoit pas encore esté employé de l'Ordonnance de comptant, afin de n'estre point obligez d'en expedier vne nouuelle pour la creation des dix-sept mille huit cents trois liures dix sols, restans; Cette desense auroit plus de couleur & de vray-semblance, puisque l'on a pratique quelque chose de semblable en l'année 1648. & suiuantes, lors que les prests ayans esté reuoquez, l'on n'a pas laissé de se seruir des Ordonnances de comptant qui auoient esté expediées pour les interests, mais de les faire passer en remise d'vn Tresorier de l'Espargne à vn autre. Mais outre que cela ne s'est pratiqué que dans vne necessité pressante, & à cause que la Chambre des Comptes ayant reduit les contans à trois millions, l'on tut forcé d'employer ces vieilles Ordonnances pour les prests & les traitez des années 1649. 1650. & 1652. Cette validation ne fut faite qu'en vertu d'Arrest du Conseil, & d'Estats expediez en consequence; & les Tresoriers de l'Espargne donnerent leurs promesses de se charger en recette des sommes qui leur estoient remises par cette voye extraordinaire; de lorte qu'aucunes de ces formalitez, & de ces precautions, n'ayant esté mises en vsage pour la validation de l'Ordonnance d'vn million quarante mille liures, on ne croira jamais que les Ordonnateurs des Finances ayent fait passer vne partie de cette Ordonnance en remise, & ce entre deux freres, sans prendre aucune seureté pour le Roy; estant indubitable que l'on s'est seruy de l'excedant de cette Ordonnance, ou pour tenir lieu de finance actuelle des rentes qui ont esté constituées, ou pour diuertir vne somme importante.

Aussi M. du Plessis voyant que ny sur l'Ordonnance ny sur le menu de contant, ny dans son Estat arresté au Con-

seil, ny dans aucun acte particulier, il n'est pas fait la moindre mention que le surplus de cette Ordonnance ait passé en remise, & qu'elle doine subsister pour le tout, encore que la constitution n'ait esté esfectuée que pour partie, il n'a pas voulu s'engager à proposer cette defense, & a esté forcé d'auancer, pour couurir la maluersation, Que la remise estoit de la somme entiere de trois cents vingt mille quatre cents soixante-trois liures. Ainsi il faut qu'il dise que l'effectif des dix-sept mille huit cents quatre liures dix sols, montant au denier cinq à quatre-vingts neuf mille dix-lept liures dix sols, luy auoit esté payé; d'où il s'ensuit qu'il en auoit expedié ces quittances ou ces billets, sur lesquels l'on pourroit & l'on deuroit se faire deliurer les contracts, & non pas se seruir du circuit d'yne remise, non seulement inutile & contraire à l'ordre des Finances dans cette occasion, mais qui ne pourroit causer que des frais & de l'embarras aux acquereurs des rentes, & les mettre hors d'eltat d'en faire acheuer la constitution; estant certain que Claude de Guenegaud ne le seroit jamais ingeré de signer les quittances sans vne commission speciale registrée en la Chambre des Comptes; Et l'on pourroit mesme soustenir qu'vn Tresorier de l'Espargne, commis à la recepte d'vne constitution de rente en vertu de Lettres du Roy, ne peut pas valablemnt remettre vne partie du sort principal de ces rentes entre les mains de l'vn de ses confreres, s'il n'a mesme qualité & la mesme commission; à quoy si l'on adjoutte qu'il n'y a point de remile du sieur Claude de Guenegaud au sieur du Plessis, ny de la somme de deux cents trente-vn mille quatre cents cinquante liures, qui estoit l'excedant de l'Ordonnance de comptant de difference de fond, ny de trois cents vingt mille quatre cents soixante-trois liures à quoy monte le sort principal des dix-sept mille huit cents trois liures dix sols de rente qui n'ont point esté constituées, & que l'on a esté obligé de se seruir des deux remises, l'une de deux cents quatre-vingts dix-neuf mille quatre cents deux liures quinze sols, & l'autre de vingt-quatre mille cent vingt-cinq liures, & de feindre, à cause que les sommes ne quadrent pas, qu'il y a trois mille soixante & quatorze liures quinze sols. De plus que l'on a melle quelqu'autre affaire dans ces remiles.

Il est aisé de voir que M. du Plessis ne se pouuant justifier de cette maluersation qu'on luy impute, tasche d'obscurcir par des ombres la lumiere de la verité qui le presse, & de trouuer son salut dans les tenebres & dans la consusson.

L'on ne pretend pas establir pour maxime que pour la validité d'vne remise vn Tresorier de l'Espargne soit obligé de rapporter vn Resultat du Conseil, ny mesme l'Ordonnance de remise: l'on sçait que l'vsage a esté de supprimer l'vn & l'autre apres les roolles arrestez au Conseil. Et quoy que la suppression de ces Ordonnances ait esté vn moyen dont on s'est seruy pour couurir vne infinité de maluersations, pour valider de fausses depenses, & sur tout pour reformer de vieux billets: Neantmoins puisque cet abus estoit non seulement toleré, mais autorisé par les Ordonnateurs des Finances, on ne pretend pas en faire vn crime au sieur de Guenegaud, ny luy imputer de n'auoir pas obserué des formalitez qui n'estoient pas lors en pratique; mais l'on soustient que s'agissant d'vne affaire extraordinaire, & d'vne Ordonnance de difference de fonds, qui ne deuroit estre employée qu'à proportion de la constitution des rentes, si l'on vouloit faire passer en remise vne partie de cette Ordonnance, ou des billets expediez en consequence, il estoit necessaire d'vn Relultat du Conseil; & ce tant pour la seureté du Roy, que pour celle du Tresorier de l'Espargne. Si il suffit de dire que le surplus de cette Ordonnance a passé en reprise sans en rapporter de preuue par vn Resultat du Conseil, ou par vne apostille mise ou sur l'Estat du sieur de Guenegaud arresté au Conseil, ou sur le menu de contant, qui peut douter que M. du Plessis ne fust en plein pouuoir d'en abuser, & de conuertir à son profit l'excedant de cette Ordonnance de comptant? Les remises ne sont point libellées, ils se sont donnez son frere & luy reciproquement vne infinité de quittances, & pour des sommes immenses. Il estoit donc en sa liberté de disposer & de prendre pour luy le surplus de cette Ordonnance; & en cas qu'il en fust recherché, il n'auoit qu'à feindre, comme il a fait, que cette partie auoit passé en remise, & qu'il en auoit donné quittance à son frere, estant asseuré qu'on ne le pouvoit jamais convaincre du contraire; & n'estant pas possible que dans yn si grand nombre de

quittances par luy expediées à la decharge de son frere, il ne s'en trouuast quelqu'vne qui quadrast à peu prés à la somme de trois cents vingt mille quatre cents soixante & treize liures, qui est le surplus de son principal des quatre-vingts mille liures de rente, doit-on receuoir pour vne defense legitime vn fait que l'on articule sans preuue, & qui peut estre egalement allegué & par celuy qui est coupable, & par celuy

qui seroit innocent?

Il y a plus; Comme l'employ de cette Ordonnance de comptant estoit vne maluersation visible, les rentes n'ayant point esté entierement constituées, & M. du Plessis pouuant craindre auec raison d'en estre vn jour recherché, auroit-il voulu se mettre dans ce peril sans auoir toutes ses decharges? N'auroit-il pas desiré qu'il fust fait mention de cette remile ou lur le menu de contant, ou sur son Estat arresté au Conseil? Ne sçauoit-il pas que lors qu'il diroit que l'excedant de cette Ordonnance auoit passé en remise, il n'auoit aucun priuilege pour en estre crû à la parole, & que s'il n'en apportoit la preuue, il ne pourroit euiter d'estre condamné à la restitution de cette partie? Luy pouuoit-on retuler ou vne apostille sur le menu de contant, ou vn Resultat du Conseil pour sa seureté? & auroit-il manqué de le demander si les choses s'estoient passées dans l'ordre & dans la bonne foy?

Dans les remises qui se sont pour acquitter les despenses comptables & ordinaires, l'on a pû se dispenser apres les roolles arrestez de garder les Ordonnances de remise; parce que le Roy estant vne sois debiteur, il semble qu'il est assez indisferent sur le sond de quelle année l'on acquitte vne dépense legitime. Mais il n'en est pas ainsi d'vne Ordonnance de disserence de sond, ce n'est point vne dépense, c'est vne simple décharge que l'on donne au Tresorier de l'Espargne: l'ordre des Finances veut qu'on ne puisse constituer des rentes qu'au denier dix-huit; mais comme elles estoient dans le commerce à vn prix beaucoup plus bas, à cause des retranchemens, le Tresorier de l'Espargne estant obligé de se charger en recette du sort principal des rentes, sur le pied du denier dix-huit, & n'en receuant actuellement que le denier trois, quatre ou cinq, selon la nature des ren-

tes, il falloit suy donner sa décharge pour le surplus, ce qui ne se pouvoit que par vne Ordonnance de difference de fond, qui estant employée dans le menu de contant, & faifant partie de la certification que l'on enuoye à la Chambre, des Comptes, tient lieu de dépense au Tresorier de l'Espargne; mais d'vne dépense feinte & simulée, pour l'indemniser d'vne recette aussi feinte & imaginaire, & suppleer à ce qu'il ne reçoit pas du prix des rentes, & qu'il confesse en auoir receu: Tant qu'vne Ordonnance de difference de fonds sert à l'vsage auquel elle est destinée, & qu'on l'employe pour remplir le vuide qui se rencontroit toussours dans les nouuelles constitutions de rente, le Roy n'en peut souffrir aucun prejudice; Mais quand la constitution des rentes n'est point faite, ou n'est point acheuée, l'Ordonnance de disserence de fonds doit estre ou retirée ou diminuée à proportion; & si l'on l'employe entierement en depense, c'est vn faux employ & vn vol manitelte dont le Treforier de l'Epargne est seul coupable, à moins qu'il n'en indique & qu'il n'en justifie les autheurs, & qu'il ne rapporte des ordres precis du Conseil pour sa decharge.

cis du Conseil pour sa decharge.

Si dans l'Epargne du sieur Claude de Guenegaud la confitution des rentes auoit esté acheuée, & qu'il se chargeast en

recette des trois cents vingt mille quatre cents loixante trois liures, qui auec les onze cents dix-neuf mille cinq cents trente-sept liures, deuoient composer le sort principal des quatre-vingts mille liures de rente, quoy que les formalitez n'eussent pas esté obseruées, cela seroit sans doute suffisant pour mettre à couvert le sieur du Plessis; parce qu'il seroit constant que l'Ordonnance de comptant auroit esté employée suiuant sa destination, & qu'on n'en auroit pas abulé: Mais au contraire la constitution des rentes estant demeurée imparfaite, ny le sieur Claude de Guenegaud ny aucun Tresorier de l'Espargne n'ayant fait jamais aucune recette du sort principal de ces quatre-vingts mille liures de rente, si l'excedant de l'Ordonnance de comptant auoit passé en remise, ce seroit le sieur Claude de Guenegaud qui seroit coupable d'auoir diuerty la somme de trois cents vingt mille quatre cents soixante & quatorze liures; parce que la remise procedant originairement d'vne Ordonnance de

difference de fonds, il auroit esté obligé de faire recette de pareille somme sur la mesme nature de deniers: Mais le sieur Claude de Guenegaud ne s'estant jamais messe de cette constitution de rentes, n'ayant point eu pouuoir de le faire, n'estant fait aucune mention dans son compte, ny de la creation des rentes, ny de l'Ordonnance de difference de fonds: Enfin n'y ayant aucune preuue contre luy, ny rien de son fait qui le puisse engager en cette affaire; quelle apparence que le sieur du Plessis, conuaincu d'vne maluersation qui ne sçauroit receuoir d'excuse en puisse rejetter l'enuie & le crime sur son frere. La maluersation est certaine, mais dans la difficulté de sçauoir lequel des deux freres en est coupable, il faut demeurer d'accord qu'il n'y a point de preuue contre Claude, & que la conuiction est toute entiere contre Henry de Guenegaud, qui ayant joue toutes sortes de personnages dans la creation de ces rentes, soit comme Secretaire d'Estat, comme Tresorier de l'Espargne, ou comme commis à la constitution, est seul responsable de tous les abus qui s'y sont commis, & qui se peut d'autant moins defendre en alleguant vne remile imaginaire, qu'il auoit deux qualitez jointes en la personne, celle de Tresorier de l'Espargne, & de commis à la constitution, & cette derniere l'engageoit à faire vne recette entiere du sort principal des quatre-vingts mille liures de rente, à moins que la constitution ne fust reuoquée ou suspenduë.

M. du Plessis ne peut pas dire qu'il a seulement donné ses quittances comme Tresorier de l'Espargne, & qu'il n'a point agi comme commis à la constitution: En esset, il a tellement reconnu qu'il auoit besoin d'une commission specialle pour trauailler à la creation des rentes, qu'il en a fait verisser une à la Chambre des Comptes; & comme il auoit negligé de la rapporter lors de l'examen de son compte, sa recette auoit esté tenuë indecise. Il est vray que cét employ n'estoit pas sort honnorable à un Tresorier de l'Espargne, & moins encoreà un Secretaire d'Estat; & il est de notorieté publique que Petit, Payeur des rentes, a tousiours esté chargé de ces commissions: Mais comme il estoit exact, le sieur du Plessis n'a pas voulu passer par ses mains. L'on

sçait bien qu'vn commis à receuoir le sort principal d'vne constitution, n'entre pas en connoissance d'où procedent les quittances de l'Espargne qui luy sont tournies, ny si elles ont esté expediées pour de bonnes ou mauuailes dépenses. Mais vn commis à la constitution de quatre-vingts mille liures de rente, qui n'en a constitué que soixantedeux mille cent quatre-vingts seize liures dix sols, estant obligé de rendre à la Chambre vn compte particulier de son maniement; il auroit voulu penetrer pourquoy le reste des Contracts n'estoit point expedié; Il auroit demandé au Conteil vn Arrest pour sa décharge, & par cette poursuite la verité estant connuë, il estoit à craindre que ceux qui gouuernoient les Finances n'eussent pas assez de complaisance pour tolerer cette maluerlation. Et l'on soustient en vn mot, que le sieur du Plessis ayant esté commis pour recenoir le sort principal de cette constitution, sa commission ne portant point de temps limité, elle ne pouvoit cesser que par vne reuocation formelle, ou par la subrogation d'vne autre personne en sa place: De sorte que s'il a receu, comme il suppose, les quatorze cents quarante mille siures pour le sort principal des rentes, il n'a pû ny deu se charger de cette somme, ny pour le tout, ny pour partie qu'enuers vn autre commis à la constitution, qui eust pouvoir de la receuoir en la place, & de concourir à la creation des rentes. Il faut donc qu'il demeure pour constant que ce que le sieur de Guenegaudallegue, que le surplus de cette constitution a esté par luy receu de Claude de Guenegaud, son successeur, est vne chimere & vne pure imagination, non seulement destituée de preuue, & contraire à la verité; mais qui choque le sens commun, la vray-semblance, & les maximes les plus triuiales des Finances: Et qu'ainsi quelque déguisement dont on ait voulu se seruir, il est nettement verifié que l'Ordonnance entiere d'vn million quarante mille liures pour la difference des quatre-vingts mille liures de rente, a esté employée dans l'estat & dans la certification du comptant, & que cependant l'on n'a constitué que soixante-deux mille cent quatre-vingts seize liures dix sols de rentes: En sorte que c'estoit vn faux employ ou vne omission de recette, dont il demeure parfaitement conuaincu.

Apres cela il ne reste plus qu'à examiner si M. du Plessis a esté interessé & dans la constitution & dans le rachapt de ces rentes. Il soustient n'y auoir eu aucune part, & fait vn grand discours pour monstrer qu'à moins de rapporter des preuues formelles, on ne peut prononcer aucune condemnation contre luy; n'estant pas juste d'appuyer vne vieille recherche sur de simples conjectures qui n'ont rien que de tres-incertain, & qui ne sont tout au plus que l'effet du hazard. Si cette propolition auoit esté autorisée, le Roy ne pouvoit pas esperer de tirer aucun secours de la Chambre de Iustice; Tous les Prests, les Traitez, & les remboursemens des rentes auoient esté faits sous des noms inconnus, & quelquefois supposez: Il n'y auoit ny à l'Espargne, ny au Greffe du Conseil, aucun acte de cautionnement. Les Tresoriers de l'Espargne auoient eux-melmes fauorilé cette obscurité pour cacher dans la confusion les affaires où ils estoient interessez en leurs noms; & si l'on eust suiuy cette maxime, toutes les taxes & les restitutions auroient tombé sur des personnes ou inconnuës ou insoluables. Qui doute que si on auoit traité les choses à la rigueur, l'on ne peust obliger les Tresoriers de l'Espargne à indiquer ceux qui auoient fait des prests, ou receu des rembourlemens pendant l'année de leur exercice, puilque le deuoir de leur charge, & la fidelité qu'ils deuoient au Roy les engageoit de conseruer des memoires exacts, & d'inserer dans leurs Registres les veritables noms de ceux aufquels ils expedioient leurs billers, & de ne se pas contenter des décharges qui leur estoient fournies par des valets ou des gens de neant? Mais si l'on en a vse auec plus d'indulgence, l'on n'a point fait de scrupule quand le nom d'vn Fermier, d'vn Receueur general ou d'vn Traitant, s'est trouué cotté au bas d'vn Arrest de prest, ou d'vne Ordonnance de comptant, de le condamner à la restitution de l'excedant de l'interest, ou de la remise. La mesme chose s'est pratiquée dans les rentes rachetées, ou sur des presomptions encore plus legeres. L'on a prononce vne infinité de condemnations, qui toutes le sont trouuées legitimes, par l'adueu melme de ceux qui s'estoient d'abord defendus par une denegation pareille à celle du sieur de Guenegaud. Si donc M. du Plessis n'a point de faueur particuliere qui l'exempte de la regle generale, il

est aise de monstrer non seulement par le concours d'vne infinité de circonstances, mais aussi par des raisons si fortes, qu'elles doiuent passer pour des preuues formelles que ç'a esté à son profit que les quatre-vingts mille liures de rente ont esté constituées & remboursées. Il paroist assez par les pieces qui ont elté rapportées qu'il n'y a point de Traitant en cette constitution. D'abord vn nomme Seuerin Besnard auoit propolé d'en traiter, & c'estoit sur les offres que l'Edict de restablissement & l'Ordonnance de comptant avoient esté expediez: Mais ce traité a esté reuoqué, & le sieur de Guenegaud a elté commis à la recette du sort principal des rentes. Il faut donc ou qu'il ait ait esté interessé personnellement en cette affaire, ou que l'intention du Conscil ait esté de distribuer ces rentes à ceux qui les voudroient acquerir. Mais il est de notorieté publique que les rentes sur les Tailles n'eltoient pas alors dans le commerce sur le pied du denier cinq; ausli ne void-on pas que les rentes avent esté venduës à des particuliers, tous les Contracts qui en ont esté expediez, sont sous les noms de la Roche & de la Coste, qui n'en ont jamais fait aucune declaration; & il est tellement veritable que toutes ces rentes appartenoient à vne ieule personne, que l'Ordonnance de comptant pour les jouissances est sous le nom de la Roche, endossée par luy seul, quoy qu'vne partie des Contracts fust remplie du nom de la Coste.

Si les rentes auoient esté venduës en détail, ou si on les auoit données en payement sur quelques assignations, les proprietaires se seroient fait immatriculer sur les Registres des Payeurs, & ils n'auroient pas eu le credit de se faire accorder le remboursement au denier quatorze de ces rentes qu'ils venoient d'acheter au denier cinq. De sorte que n'y ayant point eu de Traitant de cette constitution, les rentes n'ayant point esté venduës à l'Hostel de Ville, ny distribuées à des particuliers, n'y ayant eu qu'vn seul proprietaire qui ait receu le rachapt, quoy que sous des noms disserents; il faut necessairement que ce soit le Tresorier de l'Espargne auquel ces rentes ayent esté données en payement de quelques aduances seintes ou veritables.

En effet, si M. du Plessis n'auoit point eu d'interest en

cetteaffaire, pourquoy auroit-elle passé en ses mains? Pourquoy auroit-il esté commis à receuoir le sort principal de ces rentes? Il auoit esté Tresorier de l'Espargne, mais ayant esté honoré de la charge de Secretaire d'Estat, il s'estoit démis de celle de Trelorier de l'Espargne entre les mains du heur Claude de Guenegaud, son frere. Cependant l'on aftecte de faire tomber cette constitution dans l'exercice de l'année 1641, quoy que les Contracts ne soient signez qu'en l'année 1644. & que les rentes soient creées par Lettres patentes de l'année 1643. L'on sçait bien qu'vn Tresorier de l'Espargne peut receuoir toute sortes de deniers, tant que son Espargne est ouverte, & jusques à ce que son estat soit arresté au Conseil: Mais cela n'empelche pas qu'il n'y ait vne affectation visible, d'auoir porte cette constitution dans l'exercice du sieur de Guenegaud de l'année 1641. & plus encore de l'auoir commis personnellement à la recette du fort principal de ces rentes. Ces commissions ne se donnoient d'ordinaire qu'à des Payeurs des rentes intelligens dans ce negoce; & les Tresoriers de l'Espargne ne les ont jamais acceptées que lors qu'ils s'y sont trouuez engagez par leurs interests. Mais qu'vn Secretaire d'Estat, qui en cette qualité auoit signé les Lettres de Iussion pour faire verifier l'Edict de restablissement de ces rentes, ait bien voulu s'abaisser à faire la recette d'vne constitution de rente; Qu'il ait accepté vne commission, ou tout à fait incompatible auec la dignité, ou qu'il ne pouuoit au moins exercer qu'auec vne extréme indecence; & qu'il se soit chargé de tout cet embarras sans y auoir aucun interest personnel, c'est ce qu'on ne prelumera jamais; & c'est ce qui choque le bon lens & la railon. Mais comme cette constitution regardoit le sieur de Guenegaud, il a bien voulu pour son vtilité particuliere, passer pardessus la regle de la bien-seance. Il n'e-Itoir pas bien aile que le fonds de ce mystere parust dans vne autre Espargne, où il n'auroit pas peut-estre trouvé les melmes facilitez. Ainsi estant l'agent & le patient, l'acquereur des rentes, & en melme temps le vendeur & le commis à la constitution; il ne luy a pas esté difficile de s'en constituer tant & si peu qu'il a voulu.

C'est pour cela qu'il a employé sans hesiter toute l'Ordonnance donnance de comptant de difference de fond; & cét abus & cette maluerlation cy-deuant expliquée est vne preuue certaine que M. du Plessis estoit interessé dans cette constitution. Auroit-il voulu s'exposer par vne simple complaisance à commettre vn faux employ ou vne obmission de recette? Il estoit trop intelligent dans la fonction de sa Charge pour s'engager dans vne maluersation si visible, & dont il pouuoit estre conuaincu par la seule representation de l'Ordonnance de comptant, s'il n'en eust tiré vn profit tresconsiderable. A quoy si l'on adjouste que les Contracts de constitution de ces rentes, ont esté receus par Richer, Notaire ordinaire dudit sieur du Plessis; Que Me Maxime de Iean, son Commis, est celuy qui paroist auoir eu toute la direction de cette affaire, & qui a écrit de sa main l'Arrest du Conseil, qui ordonne que les rentes originairement assignées sur la Generalité d'Orleans, seront payées sur celle de Rouen. Peut-on desirer vne preuue plus formelle de la part que le sieur du Plessis auoit dans cette constitution? Comme il a bien connu la force de cét argument, il a voulu reuoquer en doute que de Iean ait esté son Commis, & a soustenu qu'il agissoit en qualité de Controolleur des restes du Conseil. Mais ce desaueu est contraire à la bonne foy, puisque de Iean par son interrogatoire, presté au mois de Mars 1665. en la Chambre de Iustice, reconnoist qu'il y a vingt-huit ans qu'il est Commis des sieurs de Guenegaud. Et d'ailleurs par son Contract de mariage de l'année 1638. il est qualifié Commis du sieur du Plessis, & le Contract est signé du sieur de Guenegaud. Et ce que l'on a voulu dire que de Iean prenoit la qualité de Commis, & qu'il n'auoit point d'appointemens, est si foible, qu'il ne metite pas de response. Et puis qu'il demeure pour constant que les Arrests du Conseil & les autres expeditions concernant cette affaire, sont escrites de la main des Commis & des domestiques des sieurs de Guenegaud, faut-il d'autre preuue pour justifier qu'il estoit interessé en cette constitution?

Mais ce qui est absolument sans replique, c'est que l'Arrest du Conseil qui change les assignations de la Generalité d'Orleans en celle de Rouen, est escrit de la main de de Iean, est cotté au dos par M. le President Tubeuf, lors Intendant des Finances. M. du Plessis quatre-vingts mille liures de rente: Bien que ces mots soient écrits en abregé, la verité en est reconnuë tant par M. le President Tubeuf que par M. du Plessis Guenegaud: Mais il allegue pour sa defenle qu'estant commis à la recette du fonds de ces rentes, cet Arrelt a esté timbré de son nom, à cause qu'il estoit chargé du soin de cette constitution. Si le ministere de M. du Ptessis ne consistoit, comme il le pretend, qu'à recenoir le sort principal de ces rentes, cet Arrest ne le regardoit point, c'estoit aux acquereurs à faire leurs diligences pour obtenir que le fond en fust laissé dans vne des recettes generales, où elles pouuoient estre perceuës auec plus de facilité. C'est pour cela que M. du Plessis, proprietaire de ces rentes, a sollicité & obtenu cét Arrest de reassignation sur la Generalité de Rouen; & c'est aussi par cette raison qu'il est cotté de son nom, & escrit par son Commis.

On sçait que les Arrests, les Ordonnances, & les autres expeditions qui concernent les Finances, ont tousiours esté cottez du nom des Traittans, ou autres personnes intereslées, & non des Tresoriers de l'Espargne ou Secretaires du Conseil. Mais le dernier procez verbal, dans lequel M. le President Tubeuf a esté entendu, éclaircit entierement cette difficulté, puisque M. le President Tubeuf est demeuré precilément d'accord, Que dans les affaires où M. du Plessis auoit agi en qualité de Tresorier de l'Espargne, mesme en tout ce qui regardoit le rembourlement des aduances qu'il auoit faites pendant ses années d'exercice; il auoit mis, soit au bas ou au dos des Ordonnances, le nom du sieur du Pleshis tout au long, lans abreulation & lans déguilement, & qu'il en auoit vsé autrement dans les prests & autres affaires où le sieur du Plessis auoit pris part depuis qu'il estoit Secretaire d'Estat. De sorte que sur l'Arrest du Conseil, qui change l'assignat du fonds des rentes de la Generalité d'Orleans en celle de Rouen, le nom de M. du Plessis n'y estant qu'en abregé, c'est vne remarque infaillible, qu'il auoit dans la constitution des rentes vn interest personnel, lequel estant connu à M. Tubeuf, il a voulu ménager la reputation d'vne personne constituée en dignité, & il n'a mis sur le dos de l'Arrest que les premieres lettres du nom du

sieur du Plessis, pour seruir d'indication à ceux qui auoient connoissance de l'affaire, & pour soulager sa memoire.

Il est datté du 3. Fevrier 1644. & ainsi posterieur aux quittances expediées par le sieur de Guenegaud pour la constitution de ces rentes.

Il est vray que M. du Plessis soustient qu'il y a de l'erreur en la datte de cet Arrest, & qu'il est du 3. Ianuier; Ce qu'il pretend justifier, parce que dans les quittances qu'il a expediées le 30. Ianuier, il fait mention de cét Arrest, qui n'auroit pas encore esté rendu, s'il n'estoit que du 3. Fevrier. Mais outre que l'on a fait voir que le 3. Ianuier 1644. estoit jour de Dimanche, & feste de sainte Geneuieue, il n'a point esté tenu de Conseil de Finances; Qu'il n'y a aucun Arrest de ce datte; y en ayant au contraire beaucoup du 3. Fevrier. Il paroist par l'inspection de la minute de l'Arrest, qu'il n'a jamais esté datté que du 3. Fevrier; la datte que le sieur de Guenegaud luy a voulu donner dans les quittances qu'il a deliurées pour la constitution des rentes, ne peut pas faire prejudice à la verité, & tout ce que l'on en peut induire est, ou que le sieur de Guenegaud a antidatté ses quittances, ce qui s'est fait souuent à l'Espargne, sans beaucoup de scrupule : ou que dans l'asseurance que cet Arrest luy seroit accorde, il en a fait mention dans ses quittances par anticipation: Mais vne preuue certaine que c'estoit au profit du sieur de Guenegaud que l'Ordonnance d'vn million quarante mille liures estoit expediée, c'est qu'il l'a employée dans le cinquieme Estat de menu de contant arresté l'onzieme Fevrier 1643. sans que lors il y eust aucun endossement, n'ayant esté endossé que plus de dix mois apres. De sorte que Seuerin Besnard n'ayant point mis son receu au dos de l'Ordonnance selon l'ordre des Finances, elle deuoit estre rejettée du menu de contant; Autrement c'estoit donner vn moyen au Tresorier de l'Epargne de profiter injustement d'vn million quarante mille liures. Mais comme le sieur du Plessis estoit celuy en faueur duquel les quatre-vingts mille liures de rente estoient constituées, & l'Ordonnance de difference de fond expediée, l'on a passé pardessus cette formalité qui estoit essentielle, s'il y en auoit, ou vn autre Traitant, & que l'affaire ne l'eust pas regardé personnellement.

Apres auoir justifié que M. de Guenegaud estoit interessé dans la constitution des quatre-vingts mille liures de rentes, il lemble qu'on n'a pas besoin d'autre preuue pour monstrer que le remboursement en a esté fait à son profit. La Roche & la Coste, qui sont les personnes dont il s'est serui pour remphir les Contracts de constitution des rentes, sont ces melmes qui en ont receu le rachapt. Mais il n'est pas inutile d'obseruer que ces rentes qui auoient vne fois esté rembourlées sur le pied du denier quatorze, ayant esté de nouueau constituées en l'année 1644. le Roy ne deuant receuoir que le denier cinq du prix de cette constitution, & n'en ayant actuellement receu que la somme de dix - neuf mille cinq cents trente-lept liures, le lurplus ayant elté absorbé par deux Ordonnances, l'vne de difference de fonds, & l'autre pour la jouissance; ces mesmes rentes en l'année 1645. sont encore vne fois remboursées sur le pied du denier quatorze. Peut-on s'imaginer vn plus grand desordre, & vne dissipation plus extraordinaire des Finances du Roy?

C'est dans les deux années d'exercice de 1644. & 1647. du sieur Claude de Guenegaud que ces remboursemens ont esté employez, parce que l'on ne vouloit pas que des estrangers eussent connoissance de ce mystere. Qui pourra se perluader que cela soit arrivé sans affectation, & par yn pur hazard? Vn remboursement de quatre-vingts sept mille sept cents cinquante-vne liures en deux parties, ne peut auoir esté accordé qu'à vn Traitant ou à vn Tresorier de l'Espargne. Comme la remise d'vn Traité, ou l'interest d'vn prest, les quatre-vingts mille liures de rente n'auoient point esté constituées en faueur d'vn Traitant, la recette du sort principal auoit esté faite directement à l'Espargne, c'estoit donc au Tresorier de l'Espargne, ou à des assignez que ces rentes appartenoient. De sorte, qu'ayant justifié qu'il n'y a point eu de particulier acquereur de ces rentes, estant notoire que quand il y en auroit eu, leur credit n'auroit pas esté assez suffisant pour obtenir vn remboursement de huit cents sept mille sept cents cinquante vne liures, il doit demeurer pour constant que le sieur du Plessis est le seul qui en a profité, comme le seul interessé dans la constitution. Si

l'on ne rapporte pas de preuue par escrit qui le charge d'auoir receu le rachapt de ces rentes, c'est que preuoyant qu'il pourroit estre vn jour recherché, il s'est seruy de noms & de personnes interposees dans toutes les affaires qui se sont faites depuis trente ans auec le Roy. L'on a employé le ministere des valets ou des Commis; & ceux qui estoient les veritables interessez dans les prests & dans les Traitez, ont toûjours affecté de ne point paroistre dans les actes publics. S'ils ont contracté des societez, & s'ils ont tiré des declarations, c'a toûjours esté sous seing priué, & sans jamais en laisser des minutes chez les Notaires. La Roche & la Coste sont constamment des noms interposez, il s'agit de sçauoir qui a esté sous leur nom le veritable proprietaire. M. du Plessis a esté commis à la recette de cette constitution; Il en a receu ou deu receuoir le sort principal: Pourquoy depuis tant de temps que ce procez est intenté contre luy, ny luy ny eux, qui estoient pour lors Commis de l'Espargne, n'ontils pû le remettre en memoire les Traitans ou les acquereurs de ces rentes par vne indication veritable & ingenuë? Il pouuoit se garentir d'vn procez, qui outre le peril de la restitution qu'on luy demande, peut faire encore prejudice à sa reputation; Cependant il est demeuré dans la reserue; il s'est contenté de dire que tout ce qui s'estoit fait dans les années d'exercice de son frere ne suy pouvoit pas estre imputé. Cette response auroit quelque apparence, si dans l'origine il n'auoit pas presté son ministere à la constitution des rentes qui ne peuuent auoir esté rachetées qu'en faueur de celuy qui en estoit proprietaire. Et comme il n'en paroist point d'autre que M. du Plessis, c'est donc luy qui a profité du rembourfement.

Mais il faut passer plus auant, & examiner si Iean de la Roche, pretendu acquereur de ces rentes, n'estoit pas vn homme du nom duquel le sieur du Plessis se seruoit pour les prests & les autres affaires qu'il faisoit auec le Roy. L'on rapporte vn Arrest de prest escrit de la main de Me Maxime de Iean, & par luy remply du nom de la Roche. Le prest estoit sait constamment par le sieur du Plessis, & il ne le desaduoüe pas. Il est vray que l'Ordonnance de comptant a esté remplie du nom de Poncet; & sur cela M. du Plessis s'est

escrié, & a voulu pretendre que l'Arrest de prest estant en blanc, on l'auoit par mauuais artifice, & pour se preparer vne preuue contre luy, remply du nom de lean de la Roche. Mais lors que l'on a voulu éclaircir d'où venoit cette diuersité, & s'il y auoit de l'artifice & de la supposition, qui en estoient les autheurs, l'on a verissé que le nom de Iean de la Roche, dans l'Arrest de prest, est escrit de la main de Me Maxime Dejean: De sorte que de quelque deguisement dont on se puisse seruir, il doit demeurer pour constant par toutes les pieces qui sont representées, que la Roche & Poncet estoient des personnes, ou des noms dont le sieur de Guenegaud se servoit indifferemment, & qu'il les employoit dans les prests. Il s'en est encore seruy & pour la constitution & pour le remboursement de ces rentes: A quoy il faut adjouster vn autre Arrest de prest du 3. Fevrier 1644. sous le nom de Iean de la Roche. Ce prest est de six cents cinquantecinq mille cinq cents liures. Cét Arrest est joint à vn autre datté du mesme jour, qui porte que le sieur du Plessis sera remboursé de quatre cents cinquante mille liures: L'vn & l'autre de ces deux Arrests sont escrits de la main de Dejean. Et au dos de l'Arrest de prest M. le President Tubeuf a mis, Prest de six cents cinquante-cinq mille cinq cents liures sur les Gabelles, 47. Interest, deux cents six mille cinq cents liures comptant, quatre cents cinquante mille liures pour les reassignations. Alençon, 41. M. du Plessis, Remise & reassignation.

M. du Plessis aduouë qu'il estoit assigné de quatre cents cinquante mille liures sur le prest, & que c'est pour cela que son nom a esté cotté au bas de l'Arrest: mais si ce prest auoit esté fait par vn autre, les expeditions n'en seroient pas écrittes de la main de Dejean; & M. Tubeuf auroit mis au bas de l'Arrest le nom de celuy qui faisoit le prest: Et puisqu'il n'a fait mention que du sieur du Plessis, il faut sans doute qu'il ait sceu que c'estoit luy qui faisoit cette aduance, sous le nom de la Roche. Cette derniere preuue seroit seule suffisante, quand l'on n'en rapporteroit aucune autre, & le sieur du Plessis s'estant diuerses sois seruy du nom de la Roche, c'est à luy à répondre de toutes les Ordonnances de comptant & de tous les remboursemens dans lesquels se trouue employé le nom de la Roche.

Mais comme le sieur du Plessis fait vn grand effort pour justifier que la Roche n'a point esté son domestique, & qu'il ne s'est jamais seruy de son nom dans les prests & dans les autres affaires qu'il a faites auec le Roy, il est necessaire de remarquer que le 7. May 1642. il fut expedié vn Arrest de prest de trois cents soixante-sept mille liures, dont le remboursement estoit assigné sur la recette generale de Paris de l'année 1644. Pour l'interest de ce prest il a esté expedié vne Ordonnance de comptant de la somme de quatrevingts quatre mille sept cents liures; au bas de laquelle est écrit que le net du prest doit estre payé au sieur du Plessis pour son remboursement de pareille somme dont il estoit assigné sur le domaine de Dauphiné. Il est vray que tant l'Ordonnance que le menu de comptant, sont remplies du nom de Poncet: mais l'Arrest de prest estant écrit de la main de Dejean, & par luy remply du nom de la Roche, Iouuenot commis au Greffe du Conseil, ayant écrit au bas de cet Arrest, M. le Tresorier de l'Espargne; il est aisé de conclurre, & que M. du Plessis estoit seul interessé dans ce prest, comme il en demeure d'accord, & que la Roche & Poncet estoient des domestiques & des gens de neant, du nom desquels il se seruoit indifferemment dans les affaires qu'il faisoit auec le Roy.

Il est encore justifié par les pieces qui sont rapportées, qu'il a esté sait deux prests le 3. Feurier de l'année 1644. I'vn sous le nom de Louis d'Angeuille de cinq cents soixante & onze mille cent trente-neuf liures, dont il deuoit estre payé quatre cents mille liures comptant, & les cent soixante & onze mille cent trente-neuf liures restant, estoient pour les interests à raison de dix pour cent, pour deux ans cinq mois; & de quinze pour cent pour vn an: Ce prest estoit assigné sur les quartiers de Ianuier & Auril de l'année 1647. des Entrées & des Gabelles de France; sçauoir, cent quarante quatre mille cinq cents liures sur les Gabelles, & quatre cents vingts-six mille six cents trente-neuf liures sur les Entrées. L'Ordonnance de comptant est cottée au dos, Prest

de M. du Plesis, Chambre de Iustice.

M. du Plessis auouë qu'il a esté interessé dans ce prest, conjointement auec ses coheritiers. Le mesme jour il s'en

est fait vn autre sous le nom de Iean de la Roche de six cents cinquante-cinq mille cinq cents liures; sçauoir, quatre cents cinquante mille liures de principal, & deux cents cinq mille cinq cents liures d'interest, le prest est encore assigné sur les quartiers de Januier & Auril de l'année 1647. de la Ferme des Gabelles, & au bas de l'Ordonnance M. Tubeuf a écrit ces mots; à la charge de payer les quatre cents cinquante mille liures comptant, pour estre remis à M. du Plesis, cydeuant Tresorier de l'Espargne, pour reassignation de pareille somme sur ce qu'il auoit à prendre pour les aduances ordinaires de sadite charge de l'année 1641. sur la recette generale d'Alençon de ladite

année 1641.

M. du Plessis demeure d'accord qu'il estoit assigné sur le prest de quatre cents cinquante mille liures; mais il dénie d'auoir esté interessé dans ce prest. Cependant & l'Arrest de prest, & l'Ordonnance de comptant, sont escrits de la main de Dejean. L'endossement de l'Ordonnance de comptant est escrit de la main de Roollot; ce qui marque que les sieurs de Guenegaud estoient personnellement interessez dans cette affaire; Et ce d'autant plus que toutes les Ordonnances de comptant estant employées dans les menus de contant de l'année 1643. qui estoit l'exercice du sieur Gedoüin, commis à la Charge du sieur de la Baziniere, ny Roollot ny Dejean n'auroient elcrit ny les Arrelts de prest, ny les Ordonnances, ny les endossemens dans des prests où les sieurs de Guenegaud n'auroient point eu d'interest. Mais comme ce que M. Tubeuf a mis au bas de l'Ordonnance de comptant de prest de Iean de la Roche, est semblable à ce qu'il auoit mis au bas de l'Ordonnance de prest de Poncet aussi auouant l'vn, l'autre ne peut estre par luy desauoué.

D'ailleurs si M. du Plessis n'auoit point esté interessé dans le prest de la Roche, il auroit receu sur le champ les quatre cents cinquante mille liures desquels il estoit assigné sur le prest, & il n'auroit eu aucune part au remboursement que les Fermiers des Gabelles auoient fait en 1647. Cependant il est justifié par le Compulsoire qu'on a fait des registres de Huguet de Semonuille, lors Commis general des Gabelles, & de Ranchin l'vn des interessez dans les Entrées; que Dejean a receu le remboursement entier, tant du prest de

33

Iean de la Roche, que de celuy de Daugeuille pour la portion qui en estoit assignée sur les Gabelles: Et que ce qui en estoit assigné sur les Entrées a pareillement esté receu par M. du Plessis. C'est donc sans raison qu'il se plaint qu'on a affecté de confondre les prests de Daugeuille & de la Roche; comme s'ils auoient esté faits par la mesme personne, & qu'il soustient qu'il a esté interessé dans l'vn & qu'il n'a point eu de part dans l'autre, & puisque Dejean à receu le remboursement de toutes les deux, on ne peut pas douter que M. du Plessis & sa famille n'ait fait l'vn & l'autre de ces prests. Et quand il allegue qu'il ne s'est point seruy du ministere de Dejean, qu'il a receu par ses mains des Fermiers des Entrées ce qui luy appartenoit dans le prest de Daugeuille, dans lequel la Dame de Belnouë estant interessée, sa portion a esté receuë par Dejean.

Cette defense pourroit auoir quelque couleur si Dejean n'auoit receu que les cent quarante - quatre mille cinq cents liures du prest de Daugeuille; mais les rescriptions & les quittances de l'Espargne pour le remboursement de ces deux prests ont esté expediées consusément; ce qui est vne preuue certaine qu'ils s'estoient faits par les mesmes personnes, & toutes ces rescriptions ont esté acquittées entre les mains de Dejean, qui est depuis trente ans Commis des sieurs de Guenegaud, & quoy qu'il sust pour lors commis de l'Espargne, estant redeuable de sa fortune à M. du Plessis, & plus intelligent dans ce negoce de prest & de quittance de l'Espargne que les Commis d'vn Secretaire

d'Estat.

Et à l'égard des quatre cents vingt-six mille six cents trente-neuf liures assignez sur la ferme des Entrées, comme le payement en a esté fait d'abord en billets, M. du Plessis n'a pas eu besoin d'employer personne pour en faire la recette.

M. du Plessis se voyant conuaincu par les registres de Huguet & de Ranchin d'auoir fait le prest de six cents cinquante-cinq mille cinq cents liures, sous le nom de Iean de la Roche, il soustient que ces pieces sont des écritures priuées, qui ne peuuent faire soy en Iustice, contre des estrangers, & dont on ne peut induire aucune preuue contre

Que si M. du Plessis veut que les Registres de Huguet & de Ranchin ne soient pas des pieces autentiques, & qui puissent faire toy contre luy, il ne disputera pas sans doute la verité de ceux de Gedouin, qui sont des Registres des rescriptions & quittances de l'Espargne de l'année 1643. Cependant par ce Registre il paroist qu'apres plusieurs changemens & reformations, il a esté enfin expedié six rescriptions libellées pour le remboursement du prest de Iean de la Roche. La premiere cent quatre-vingts quatorze mille quatre cents seize liures; La deuxième de cent trente-trois mille trois cents trente-quatre liures; La troisiéme de soixante mille liures; La quatriéme de quatre-vingts douze mille cinq cents quatre-vingts neuf liures; La cinquiéme de trente-mille liures; La sixième & derniere de cent quarante-cinq mille cent soixante-vne liures, outre les six rescriptions dattées du 12. Feurier 1644. qui montent ensemble à six cents cinquante-cinq mille cinq cents liures, & qui comprennent par consequent le remboursement entier du prest de Iean de la Roche. Il en a esté expedié deux autres le mesme jour de ioixante & douze mille deux cents cinquante liures, chacune libellées pour le remboursement du prest de Louis Daugeuille en ce qui en estoit assigné sur les Gabelles; le surplus estant payable sur les Entrées. Tous ces billets de l'vn & de

l'autre prest ont esté convertis en quittances; mais au lieu de huit billets, l'on a expedié six quittances, dont il y en a quatre qui sont des melmes sommes que quatre des relcriptions du prest de la Roche: Les deux autres quittances comprennent les quatre autres, dont deux du prest de Iean de la Roche, & les deux autres du prest de Daugeuille; mais en telle sorte que pour compter vne quittance l'on a joint vne des rescriptions du prest de la Roche à vne autre de celuy de Daugeuille. Ainsi la quittance de deux cents soixante six mille six cents soixante-six liures a esté expediée pour & au lieu de deux rescriptions; l'vne de cent quatre-vingts quatorze mille quatre cents seize liures du prest de la Roche: l'autre de douze mille deux cents cinquante liures de celuy de Daugeuille, & celle de deux cents quatorze mille quatre cents onze liures, contient la rescription de cent quarantecinq mille cent soixante-vne liures du prest de la Roche; Et celle de douze mille deux cents cinquante liures de celuy de Daugeuille, ce qui justifie clairement que ces deux prests ont esté faits par la mesme personne, & que le sieur de Guenegaud estoit interessé dans l'vn & dans l'autre : Car outre que toutes les rescriptions pour le remboursement de ces deux prests, ne se trouueroient pas dattées du mesme jour, 11 les auteurs en estoient differents, pourquoy la rescription du prest de Daugeuille, auquel M. du Plessis auoit part par la propre confession, se trouveroient-elles messées auec celles du prest de Iean de la Roche, qu'il desaduoue, & dont il soustient n'auoir aucune connoissance? Il est indubitable que ce messange ne s'est fait, & que l'on n'a joint dans vne melme quittance les rescriptions de deux prests disferents, que parce qu'ils auoient esté faits par la mesme personne; & l'on ne peut pas dire que cette conuersion des rescriptions en quittances regarde les Fermiers plûtost que ceux qui ont fait les prests, puis qu'il paroist que les quittances sont dattées du 12. Fevrier 1646. & que le remboursement du prest estant assigné sur les quartiers de Ianuier & Auril de l'année 1647. dont les payemens ne commencent qu'au 15. May & au 15. Aoust, les Fermiers n'auroient pû faire changer ces rescriptions en quittances qu'apres les auoir acquittées, & le 12. Fevrier le terme n'en estant pas escheu, il est impossible

de s'imaginer qu'ils les eussent acquittées par aduance de 15. mois; & ce d'autant plus qu'il paroist par le Registre de Huguet, qui en cela ne peut estre suspect, que le remboursement de ces quittances a esté fait depuis le 10. Aoust 1647.

jusqu'au 15. Octobre suiuant.

Mais apres le dernier Procez verbal contenant la representation & l'extrait des Registres tenus par M. Tubeuf en qualité d'Intendant des Finances, ayant le departement de l'Espargne, comment peut-on desaduoüer que le prest de Iean de la Roche n'ait esté fait par M. du Plessis de Guenegaud? Ne paroilt-il pas par ces Regiltres que les deux pretts de Louis Daugeuille, & de Iean de la Roche, ont esté assignez lur les quartiers de Ianuier & Auril 1647. de la Ferme generale des Gabelles; Sçauoir celuy de Daugeuille pour cent quarante-quatre mille cinq cents liures, & celuy de la Roche originairement pour six cents cinquante cinq mille cinq cents liures; Et depuis à cause du manque de fonds pour cinq cents soixante-deux mille neuf cents onze liures; & les deux prests ne sont-ils pas l'vn & l'autre enregistrez lous le nom du sieur de Guenegaud? M. Tubeut n'a-t'il pas reconnu qu'en cét endroit, par le nom de Guenegaud, qui pourroit s'appliquer aux deux freres, il auoit entendu parler de M. du Plessis? N'en a-t'il pas expliqué les raisons? & comment cela pourroit-il estre reuoqué en doute? Les deux prests sont enregistrez ensuite l'vn de l'autre & sans aucun interualle. M. du Plessis confesse qu'il estoit interessé dans le premier, comment pourroit-il desauouer le second? Il est constant par la lecture du registre, qu'ils ont esté faits tous les deux par vne melme personne; de sorte que le sieur du Plessis estant constamment autheur du premier, il faut aussi qu'il le soit du second.

Mais ce qui est encore plus precis, & qui leue toute sorte de scrupule & d'ambiguité, c'est que l'article du Registre où il est parlé du prest de la Roche, est conceu en ces termes: Prest de M. de Guenegaud sur Ianuier & Auril 1647. également, pour tenir lieu des quatre cents cinquante mille liures d'Alençon 1641. & interests cinq cents soixante-deux mille neuf cents onze

liures.

Si M. du Plessis auoit receu comptant au mois de Feurier

1644. les quatre cents cinquante mille liures, qui estoit le net & le capital de ce prest; & s'il n'auoit point eu de part dans l'Ordonnance de comptant, M. Tubeuf n'auroit pas mis sur son Registre que ce prest estoit fait par M. de Guenegaud; & ayant adjouste que c'estoit pour tenir lieu des quatre cents cinquante mille liures d'Alençon, 641. il est indubitable que ce prest a esté fait par celuy des deux freres, lequel estoit assigné de quatre cents cinquante mille liures sur la Recette generale d'Alençon, 1641. De sorte que le sieur du Plessis aduouant que c'est luy qui a fait cette aduance, & que c'est à luy que ce remboursement estoit deu, il faut en melme temps qu'il confesse que c'est luy qui a fait le prest sous le nom de la Roche. Mais l'on ne peut pas s'empelcher d'obseruer que ce prest de Iean de la Roche n'ayant pû estre remboursé sur les Gabelles 1647. & estant demeuré à M. du Plessis vne quittance de quatre-vingts douze mille cinq cents quatre-vingts neuf liures, il l'a fait renouueller par vne Ordonnance de comptant, & ce sous le nom de lean de la Roche. De verité il n'en a pas profité, le prest ayant esté rembourse d'ailleurs; ce qui marque qu'il s'est seruy en toute rencontre du nom de la Roche: & cette Ordonnance de comptant luy doit estre d'autant moins suspecte que c'est luy-mesme qui la rapporte dans sa production.

Apres cela il ne reste plus qu'à satisfaire à deux objections; Evne qu'il y a beaucoup d'Ordonnances de comptant dans les Espargnes sous le nom de la Roche, dans lesquelles on ne peut pas dire que M. du Plessis ait esté interessé, & l'on en rapporte jusques a sept de ses exercices des années 1644. & 1647. Mais il faut obseruer que les trois premieres sont remplies du nom de la Roche, ou du sieur de la Roche; & que des quatre dernieres, qui sont au profit de Iean de la Roche, il y en a deux qui doiuent estre pour M. du Plessis, l'vne de soixante mille liures pour trois quartiers de jouissance des quatre-vingts mille liures de rente. L'on pretend auoir suffisamment justifié que M. du Plessis estoit le proprietaire de ces rentes. Que c'est en sa faueur qu'elles ont esté & constituées & rembourlées, & cette jouissance est vn profit illicite, & vne maluerlation qu'on luy impute: Et l'on a soustenu que les Contracts de constitution des rentes estoient remplis

des noms de la Roche & de la Coste, mais qu'ils appartenoient effectiuement à M. du Plessis. Que l'Ordonnance pour la jouissance estant sous le nom de la Roche seul, c'estoit vne preuue qu'il n'y auoit qu'vn seul proprietaire de toutes les rentes, & qui ne pouuoit estre autre que le Tresorier de l'Espargne. Ainsi il est bien estrange qu'il rapporte pour desense ce qui sert essectiuement à sa conuiction, ou

en tout cas, ce qui est le point de la controuerse.

La seconde Ordonnance est de quatre-vingts douze mille cinq cents quatre-vingts deux liures assignez sur vn prest des Gabelles de 1648. & 1649. & elle est expediée pour & au lieu d'vne quittance de pareille somme du sieur Gedouin, commis à l'exercice de la charge de Tresorier de l'Espargne des deniers du quartier d'Auril de l'année 1647. de la Ferme generale des Gabelles, deliurées à la Roche pour partie de remboursement d'vn prest qu'il auoit fait cy-deuant au Roy, de laquelle quittance il n'a pû estre payé, attendu que les deniers du quartier n'ont esté suffisans pour acquitter les affignations. Il est visible par ce qui a esté cy-deuant expliqué, que cette rescription, qui n'auoit pû estre acquittée, faisoit partie du prest de six cents cinquante-cinq mille cinq cents liures, fait par M. du Plessis sous le nom de Iean de la Roche, & dont le rembourlement estoit assigné sur le quartier de Ianuier & Auril 1647. de la Ferme des Gabelles. Et comme l'on a justifié que l'Arrest du prest est cotté du nom de M. du Plessis; qu'il est escrit aussi-bien que l'Ordonnance de comptant de la main de ses Commis, & que ses mesmes Commis en ont receu le remboursement; qui peut douter que cette Ordonnance de reassignation ne soit encore au prosit de M. du Plessis, qui s'est encore seruy dans cette occasion du nom de la Roche?

Les deux autres Ordonnances sont, l'vne de vingt-six mille huit cents liures pour le reculement d'vn prest, & l'Ordonnance assignée sur le prest de Riom 1646. M. de Guenegaud nous ayant appris luy mesme que Dejean auoit esté commis à l'exercice de la charge de Receueur general des Finances de Riom. il y a grande apparence que M¹⁵ de Guenegaud ne luy auoient procuré cette commission que parce qu'ils estoient interessez, ou du moins assignez sur les

prests de cette Generalité. Ce prest pouvoit encore regarder Dejean en particulier, & il n'y a pas d'inconvenient qu'il se soit servy du nom de la Roche, aussi bien pour ses assaires

particulieres que pour celles de M. du Plessis.

L'autre billet, enfin, est de douze mille huit cents liures pour vn billet du sieur Chau de pareille somme, pour le second quartier de la garnison de Mets de l'année 1646. Ce billet n'est renouuellé qu'en Octobre 1648. C'est donc dans toutes les apparences vn billet negotié, que le credit d'vne personne puissante, ou l'addresse d'vn Commis de l'Espargne a fait reuiure. Pourquoy ne presumera-t'on pas que ou les sieurs de Guenegaud mesme ou Dejean, ou quelque autre de leurs Commis qui employent souuent le nom de la Roche, dans les assaires où ils estoient interessez, n'ait.

obtenu cette Ordonnance à son profit.

Quant à ce qu'on a voulu insinuer que cette recherche excede le pouuoir & la commission de Brillard, ne sçait-on pas que les affaires qui regardent les interelts du Roy, ne le decident pas par des fins de non receuoir? Brillard est commis pour tout ce qui concerne les rentes rachetées, il a trouue dans les Espargnes de 1644. & 1647. vn remboursement de huit cents soixante & dix mille sept cents cinquante vne liures, il en a recherché les autheurs, & pour les pouuoir reconnoistre, il a esté obligé de remonter jusques à la source de la creation des rentes; C'est là qu'il a découuert les abus & les maluerlations commites dans cette affaire, ayant vne preuue entiere d'vne depredation si manifeste; & que c'est en faueur de M. du Plessis que ces rentes ont esté creées & rembourlées : il a crû que ce seroit preuariquer que ne demander que la taxe des rentes rachetées, & que dans vne affaire extraordinaire, où l'on apperçoit vn vol manifelte d'vne somme importante, il ne pouuoit moins faire que d'en poursuiure la restitution auec les interests.

En effet estant clairement justifié que pour vne somme de cent quatre vingts dix-neuf mille cent trente-sept liures, l'on a creé soixante-deux mille cent quatre-vingts seize liures dix sols de rente, Que l'on a employé en dépense l'ordonnance de disserence de sonds d'vn million quarante mille liures, quoy que la constitution des rentes n'ait pas esté acheuée. Cette maluersation ayant esté commise par M. du Plessis, sans qu'il puisse rien alleguer de vray-semblable pour sa desense, paroissant par vne infinité de circonstances, & par des preuues tres-sormelles que M. du Plessis a esté seul interessé dans la constitution de ces rentes, & qu'elles n'ont pas esté si tost creées, qu'il s'en est fait accorder le remboursement au denier quatotze, n'ayant laissé d'interualle entre la datte des Contracts, & les quittances de rachapt, que pour auoir pretexte de se faire expedier vne Ordonnance de comptant pour vne année de jouissance. De sorte que l'on peut dire qu'il n'y a jamais eu d'affaire plus capable d'exciter de l'indignation; & que c'est traiter fauorablement M. du Plessis, de l'en quitter pour vne simple restitution, auec les interests.

Reste d'observer que le procez estant en estat; & apres la signification de l'Arrest, qui commet Messieurs les Commissaires pour en receuoir la communication, & celle d'vn acte par lequel Brillard declare qu'il en poursuiura incessamment le jugement. M. du Plessis s'est aduilé de presenter la Requeste le 27. Aoust 1668. par laquelle apres auoir insinué que les registres & seuilles tenuës par M. le President Tubeut pendant son Intendance des Finances, & la commission de l'Espargne, dont il a fait l'exercice en 1644. & 1647. sont pieces priuées, qui ne peuuent faire foy en justice. Il adjouste qu'il a interest d'en auoir communication; parce que sa defense & sa justification s'y pourront rencontrer, & que la piece estant deuenuë publique, par la communication qui en a esté donnée à Brillard, elle doit estre commune entre les parties, & sur ce fondement il demande que les registres & feuilles luy soient communiquées.

Brillard a donné sa réponse par vne requeste contraire, & a fait voir qu'ayant obtenu Arrest, qui luy permet de compulser les registres & seüilles, il a fait assigner M. du Plessis pardeuant M. le Commissaire, que M. du Plessis y a comparu par Me Louis Gualy, son Aduocat, & Huguenot son Commis, que l'vn & l'autre, au nom de M. du Plessis, & ayans charge de luy, ont eu toute la communication que bon leur a semblé; Qu'ils ont fait leurs requisitions; Que M. le Commissaire en a dressé son procez

verbal

verbal, & fait inserer dans iceluy les extraits, dont le compulsoire a esté requis; Que le tout a esté signissé, & qu'ainsi M. du Plessis est centé auoir comparu, s'agissant d'vne matiere ciuile, & consequemment que la chose est sans retour, se trouuant entierement consommée.

Brillard dit dauantage, & soustient que M. du Plessis est absolument non receuable en la communication qu'il demande; car il est vray que lors qu'en matiere ciuile il est permis à vne partie de compulier, & tirer vn extrait de certaine clause, qui fait partie d'vn acte ou d'vn contract, si la partie assignée, & qui defend au compulsoire, soustient que l'acte est indiuisible, & que sa defense se peut tirer de quelqu'vnes des clauses du mesme Contract, autres que celles dont la partie fait faire l'extraict : en ce cas l'acte doit estre déliuré tout entier, la piece estant commune, & ne deuant pas estre tronquée ny diuisée.

Mais si cette melme partie s'aduisoit sans cotter aucune piece particuliere, & sans autrement s'expliquer, de demander la communication de tous les Contracts que le Notaire auroit passez, pour examiner s'il trouveroit fortuitement dans les protocolles quelques Quittance, Acte ou Contract qui pust seruir à sa descharge, cette demande seroit sans doute mal receuë; car l'on n'expose pas auec tant de facilité à la curiosité ou à l'inquietude d'vne partie, des Registres, quoy que publics, qui contiennent le secret des familles, il s'en feroit de trop grands abus; Il faut estre certain de son

fait, autrement l'on n'est point escouté en Iustice.

Et si la maxime est veritable en matiere d'affaires qui ne regardent que des particuliers, combien doit-elle estre plus religieusement obseruée lors qu'il s'agit d'vn depost sacré de registres & feuilles qui concernent les Finances du Roy, qui ont vne liaison toute entiere auec les secrets plus considerables de l'Estat, & dans lesquels mesmes quantité des

principales familles peuuent estre interesses?

En vn mot Brillard a renfermé son Compulsoire dans les articles qui ont esté extraits. Le conseil de M. du Plessis en a pris communication, & depuis la lignification luy en a esté faite. Il a pû estre informé par la voye de son Aduocat & de son Commis, que les articles de ces registres & feuilles

contiennent autant d'affaires differentes, qui n'ont liaison ny consequence des vnes aux autres: Et partant en toutes façons la communication que demande M. du Plessis n'est qu'vne pure illusion, & vne adresse imaginée pour éloigner le jugement du procez, dont il preuoit assez l'euenement; estant encore bien plus fortement conuaincu par les témoignages de sa conscience, qu'il ne l'est par toutes les preuues qui sont au procez, quoy que tres-claires & tres-expresses.

Au surplus M. du Plessis reproche à Brillard par ses escrits, qu'il a mis en fait que l'Ordonnance de sond, en consequence de laquelle le rachapt d'vne partie de vingt-sept mille & tant de liures de rente a esté fait, deuoit estre rapportée, quoy que ceux qui ont quelque connoissance de l'ordre de l'Espargne, ne puissent ignorer que les Ordonnances de sond ont esté brussées, & se brussent encore à present

aussi-tost que les roolles sont arrestez.

Brillard ne croit pas auoir rien aduancé de semblable dans ses requestes & escritures; mais à tout euenement, & pour oster à M. du Plessis l'vnique aduantage qu'il pourroit auoir en l'affaire, il ne fera point de dissiculté de reconnoistre que l'vsage est de brusser ces Ordonnances de sond lors que les roolles sont arrestez, & que M. du Plessis ne peut estre tenu de les representer. Apres quoy il doit estre satisfait à cét esgard; & la declaration de Brillard doit faire cesser tout le pretexte que M. du Plessis voudroit tirer de cét inutile equiuoque.

Monsieur PVSSORT, Rapporteur.

Messieurs d'ALIGRE, DE LA MARGVERIE, MARIN, & HOTMAN, Commissaires.

articles qui ont este extraits. Levonseil de

elle faire. Il a più estre informe per la voye de ces le de lon Commis, que les articles de ces le





